

TUŽILAŠTVO BRČKO
DISTRIKTA BOSNE I HERCEGOVINE

INFORMATIVNI

BILTEN



GODINA 2023

T RANSPARENTNOST

E FIKASNOST

N EZAVISNOST



ZA VIDLJIVOST PRAVDE

BILTEN ZA VIDLJIVOST PRAVDE

Biltenom „ZA VIDLJIVOST PRAVDE“, u izdanju Tužilaštva Brčko distrikta Bosne i Hercegovine, nastojimo učiniti dodatne iskorake u približavanju uloge ovog organa i pravosudnog sistema javnosti, a time i jačanju javnog povjerenja u tužilački sistem i pravosudnu zajednicu u cjelini. Pravosuđe kao sistem, koji je uspostavljen da bude na usluzi građanima osiguranjem pravednog društva, mora konstantno pokazivati efikasnost, učinkovitost, javnu odgovornost i naročitu društvenu osjetljivost. Jedino u takvom sistemu svaki član zajednice može se osjećati sigurnim, jednakim pred zakonom i uvažanim pred institucijama, od kojih s punim pravom očekuje izvrsnost u radu i odnosu prema povjerenom javnom poslu. Uz brzu i efektivnu pravdu, građanin zaslužuje i punu transparentnost uz koju će se, jednako kao i svaki drugi subjekt zainteresiran za rad pravosuđa, uz lako dostupne informacije kao vrijedno javno dobro koje pripada svima, moći informirati i pravilno kritički odnositi spram rezultata institucija i ukupnog sistema.

Uz informacije o organizaciji, nadležnostima i misiji u osiguranju i zaštiti demokratskog društva putem vladavine prava, za koju se svakodnevno dosljedno zalažemo, u Biltenu prezentiramo informacije o radu Tužilaštva, fokusu našeg djelovanja u aktuelnom društvenom kontekstu, ali i rezultatima koje dijelimo s cijenjenim partnerskim institucijama. SARADNJA KAO PREDUSLOV USPJEHA s razlogom je glavna tema prvog broja, čijim izborom objašnjavamo svoju i ulogu drugih institucija u sektoru kojem pripadamo, djelujući kao dio šireg tima u ostvarivanju pravde u najboljem javnom interesu. Odgovor na nasilje koje se danas manifestuje u naročito teškim oblicima, inicijative i kampanje usmjerene protiv nasilja, trenutno su u naročitom fokusu zajednice, pa su opravdano i posebnom temom prvog broja Biltena.

Cijenimo da uspješnom saradnjom sa svim partnerima, kao i otvorenim odnosom prema stručnoj i najširoj javnosti, možemo unaprijediti efikasnost u zaštiti temeljnih društvenih vrijednosti kojima služimo, a tako i javno povjerenje u pravosuđe podići na viši stepen. U tom smislu, uz proaktivno informisanje putem svih raspoloživih kanala komunikacije i slobodan pristup informacijama, čvrsto podržavamo odvijanje i dvosmjerne komunikacije u cilju prijema korisnih informacija za izvršavanje tužilačkih nadležnosti, a svakako i prijedloga, primjedbi i sugestija koje mogu dodatno unaprijediti naše rezultate. U uvjerenju da će ovaj bilten, uz naše druge informacione platforme i ustaljeno efikasne procedure pristupa javnim informacijama, takođe biti koristan servis koji će postizanjem svrhe izdavanja doprinijeti vidljivosti pravde u Brčko distriktu BiH, upućujem Vam izraze najdubljeg poštovanja.

GLAVNI TUŽILAC

Zekerija MUJKANović

ZAŠTITA DEMOKRATSKOG DRUŠTVA KROZ VLADAVINU PRAVA

„U SVIJETU KOJI SVAKIM DANOM POSTAJE SVE IZAZOVNIJE MJESTO PRAVOSUĐE MORA OSTATI GARANT VLADAVINE PRAVA, KAO I MEHANIZAM OŽIVOTVORENJA OVOG CIVILIZACIJSKOG PRINCIPA NA KOJEM POČIVA DEMOKRATIJA“¹

Tužilaštvo Brčko distrikta BiH je samostalan i nezavisan organ koji u okviru Brčko distrikta Bosne i Hercegovine preduzima propisane mjere i radnje u otkrivanju i gonjenju počinitelja² krivičnih djela i vrši druge poslove određene zakonom. U okviru svojih nadležnosti Tužilaštvo štiti ostvarivanje ljudskih prava i građanskih sloboda garantiranih Ustavom Bosne i Hercegovine i Statutom Brčko distrikta, kao i ostvarivanje prava i interesa pravnih osoba utvrđenih zakonom, te osigurava statutarnost i zakonitost.

Tužilaštvo vrši svoju funkciju u skladu s Ustavom BiH i Statutom Brčko distrikta BiH, te na osnovu zakona Bosne i Hercegovine i Brčko distrikta BiH. Tužilaštvo vodi istragu i goni lica za koja sumnja da su počinili krivičnih djela i vrši druge poslove određene zakonom. Tužilaštvo je uspostavljeno sa jurisdikcijom za teritoriju Brčko distrikta BiH. U ispunjavanju svoje funkcije, Tužilaštvo učestvuje u postupcima pred Osnovnim i Apelacionim sudom Brčko distrikta BiH.



¹ KOMUNIKACIJSKA STRATEGIJA VISOKOG SUDSKOG I TUŽILAČKOG VIJEĆA BIH /TUŽILAŠTVA BRČKO DISTRIKTA BIH

² IZRAZI NAVEDENI U JEDNOM GRAMATIČKOM RODU BEZ DISKRIMINACIJE SE ODNOSI NA MUŠKARCE I NA ŽENE

EFIKASNOST, EFEKTIVNOST I KVALITET

Ključne strateške odrednice

NEZAVISNOST, INTEGRITET I TRANSPARENTNOST

MISIJA

**„PRAVOSUDNA INSTITUCIJA KOJA U SARADNJI S
DRUGIM ORGANIMA OTKRIVANJA I PROCESUIRANJA
KRIMINALA EFEKTIVNO SPROVODI PRAVDU U
KRIVIČNIM STVARIMA“**

Tužilaštvo Brčko distrikta Bosne i Hercegovine osnovano je 2000. godine Zakonom o Javnom tužilaštvu Brčko distrikta BiH s funkcijom preuzimanja, od ranijih tužilaštava s područja predratne općine Brčko, nadležnosti za krivična djela koja potpadaju pod jurisdikciju sudova Distrikta. Pod sadašnjim nazivom ovo tužilaštvo djeluje od 2007. godine, a funkciju Tužilaštva vrše glavni tužilac (1), zamjenik glavnog tužioca (1) i tužioc (6).

ORGANIZACIJA

ODSJEK ZA RATNE ZLOČINE

**ODSJEK ZA ORGANIZIRANI KRIMINAL,
PRIVREDNI KRIMINAL I KORUPCIJU**

ODSJEK ZA OPĆI KRIMINAL



[Tužilaštvo Brčko distrikta BiH, dana 1.4.2021. godine obilježilo je 21. godišnjicu od osnivanja i dvije decenije djelovanja na području distrikta Brčko kao jedinstvene lokalne samouprave pod suverenitetom Bosne i Hercegovine. Ovaj važan jubilej podsjetnik je na vrijeme integracije pravosuđa Distrikta, ali i na dvodecenijski razvoj ove pravosudne institucije. Kao odgovor na institucionalne izazove, cijeli ovaj period obilježen je stalnim jačanjem integriteta, efikasnosti i transparentnosti ovog tužilaštva s prioritetnom odgovornošću prema stanovništvu Distrikta i najširoj javnosti].

SIGURNOST GRAĐANA NAJBOLJI POKAZATELJ RADA

Tužilaštvo ima pravo i dužnost u okviru ostvarivanja svojih dužnosti, na vlastitu inicijativu ili na zahtjev, izvještavati Skupštinu Brčko distrikta BiH o svom radu kao i primjeni krivičnih zakona u Brčko distriktu, stanju kriminaliteta i tokovima kriminala, te rješavanju predmeta. Skupština prima na znanje prezentirani izvještaj uz moguće sugestije i preporuke opće prirode.

Na 45. redovnoj sjednici Skupštine, održanoj 14.6.2023. godine, glavni tužilac Zekerija Mujkanović predstavio je Izvještaj o radu Tužilaštva za 2022. godinu. Podaci sadržani u godišnjem izvještaju o radu daju osnov za ocjenu da je stanje kriminaliteta i opće sigurnosti u Brčko distriktu BiH zadovoljavajuće.

VIZIJA - TUŽILAŠTVO DISTRIKTA PREPOZNATO JE KAO JAVNO
ODGOVORNA INSTITUCIJA KOJA EFEKTIVNO DJELUJE NA UČVRŠĆIVANJU
VLADAVINE PRAVA



„Cijenimo da je osjećaj sigurnosti građana Brčko distrikta potpun. Ovakvu ocjenu zasnivamo na činjenici da u Brčko distriktu broj izvršenih krivičnih djela nije velik, teška krivična djela nisu značajnije zastupljena, a ukoliko se i dese, počinioci uglavnom budu brzo otkriveni i izuzetno brzo procesuirani. Nema krivičnih djela koja su izazvala izraženiju uznemirenost građanstva, niti težih krivičnih djela u kojima je učestvovao veći broj izvršilaca - grupe i organizovane grupe“ - izvijestio je glavni tužilac Mujkanović.

STATISTIČKI POKAZATELJI

Kvalitet rada 95,45 %

Kolektivna norma 116,24 %

{O sigurnosti u Brčkom i izgradnji povjerenja građana u multietničkoj sredini glavni tužilac Mujkanović govorio je za serijal „Grad za Svakoga / Brčko - a Place for Everyone“, koji realizira OSCE Misija u BiH. Serijal je posvećen dostignućima mirnog suživota i saradnje u Brčko distriktu BiH, gdje ljudi žive i napreduju zajedno, svakodnevnom životu i izgradnji povjerenja, onako kako ih vide građani, aktivisti i vlasti Brčko distrikta BiH. Osvrte prvih ljudi pravosuđa Brčko distrikta na ovu temu pogledajte na linku <https://www.youtube.com/watch?v=-Q2GTfbD9A&pp=ygUSYnLEjWtvlGdyYWQgemEgc3Zl>}

{Kompletan video dostupan je na linku <https://youtu.be/jIJX0CBklqg>}

TEMA PRVOG BROJA

SARADNJA KAO PREDUSLOV USPJEHA



Od osnivanja, Tužilaštvo ima dinamičnu saradnju sa međunarodnim i domaćim subjektima koji pružaju podršku pravosudnim institucijama u nastojanju da se izgradi efikasno, nezavisno i profesionalno pravosuđe. Otvorena komunikacija, kako s međunarodnim, tako i domaćim partnerima, zasnovana na međusobnom povjerenju i uvažavanju, značajno doprinosi ostvarivanju funkcija Tužilaštva.

U pravcu primjene najboljih praksi, posebno važan segment odnosi se na saradnju sa subjektima koji djeluju u oblasti pravosuđa, naročito s regulatornim institucijama, kao što su Visoko sudsko i tužilačko vijeće BiH (VSTV) i Pravosudna komisija Brčko distrikta BiH, ali i svim drugim akterima koji operativno podržavaju vladavinu prava. U tom smislu, posjeta koju su 15.2.2022. godine Tužilaštvu učinili predsjednik VSTV-a gospodin Halil Lagumdžija i član ovog tijela gospodin Slavo Lakić, pokazatelj je konzistentnog pristupa ostvarivanju općih ciljeva pravosuđa.

Kao samostalan i nezavisan organ koji preduzima propisane mjere i radnje u otkrivanju i gonjenju počilaca krivičnih djela Tužilaštvo je svih proteklih godina nastojalo na najbolji način odgovoriti svojim zadacima. Čvrstom saradnjom s domaćim i međunarodnim institucijama i nevladinim organizacijama, medijima i građanima, uz puno uvažavanje i ostvarivanje ljudskih prava i građanskih sloboda, Tužilaštvo u kontinuitetu djeluje na učvršćivanju vladavine prava kao apsolutnog institucionalnog cilja. Kroz intenzivnu saradnju s lokalnim institucijama, Tužilaštvo teži pružati doprinos izgradnji sigurnog i pravednog okruženja za sve građanke i građane distrikta Brčko.

U ostvarivanju svoje misije i vizije, uvažavajući najviše standarde profesionalnog integriteta Tužilaštvo je uvijek nastojalo promovirati odgovornost, marljivost i profesionalizam, kao nužan standard ponašanja u javnoj službi i uslov potpunog povjerenja javnosti.



{Posjeta tužilaca Policiji Brčko distrikta BiH u povodu prelaska ove partnerske institucije u nove radne prostorije, 20.5.2021. godine, iskorištena je da najviši predstavnici institucija, koje čvrsto sarađuju na provođenju zakona i stalnom unapređenju sigurnosti u zajednici, još jednom porazgovaraju o temama koje se tiču njihovog zajedničkog rada i djelovanja.}

ZAHVALJUJEMO NA PODRŠCI

Nj. E. *Michael J. Murphy*, ambasador Sjedinjenih Američkih Država u Bosni i Hercegovini, posjetio je 17. novembra 2022. g, Tužilaštvo Brčko distrikta Bosne i Hercegovine.

U okviru posjete institucijama nadležnim za suzbijanje i procesuiranje korupcije, Nj. E. *Michael Murphy* sastao se s glavnim tužiocem Tužilaštva Zekerijom Mujkanovićem, direktorom Ureda za prevenciju korupcije i koordinaciju aktivnosti na suzbijanju korupcije Brčko distrikta BiH Žarkom Ćosićem i predsjednicom Komisije za odlučivanje o sukobu interesa Admirom Mujić.



Tužilaštvo upućuje izraze zahvalnosti za dugogodišnju podršku i pomoć koju su Sjedinjene Američke Države, Evropska Unija, njene članice, ali i druge zemlje donatori, OSCE, kao i druge međunarodne organizacije, osigurale pravosuđu kroz različite projekte, uključujući rekonstrukciju i adaptaciju zgrade za rad sudova i Tužilaštva Distrikta.



Nj. E. *Christine Toudic*, ambasadorica Republike Francuske u BiH, posjetila je 11.2.2021. godine Tužilaštvo Brčko distrikta BiH, u okviru nastupne posjete ovoj lokalnoj zajednici. U kurtoaznoj posjeti ovoj pravosudnoj instituciji Nj. E. ambasadorica *Toudic* se, zajedno sa supervizorom za Brčko i prvim zamjenikom Visokog predstavnika u BiH NJ. E. *Michaelom Scanlanom*, sastala sa glavnim tužiocem Tužilaštva Distrikta.

Izrazivši u svakoj prilici iskrenu zahvalnost, glavni tužilac Mujkanović upoznao je članove visokih delegacija da je ukupno stanje sigurnosti na području Distrikta općenito, iz godine u godinu, na vrlo visokom nivou. Takođe, glavni tužilac predstavio je institucionalne kapacitete, kao i rezultate koji su na polju procesuiranja kriminala ostvareni u proteklom periodu.

SARADNJA S INSTITUCIJAMA RAZVIJENIH DEMOKRATIJA I MEĐUNARODNIM PROJEKTIMA USMJERNIM NA PRUŽANJE PODRŠKE VLADAVINI PRAVA U BIH ZNAČAJNO JE DOPRINIJELO OSTVARIVANJU MISIJE I FUNKCIJE OVOG TUŽILAŠTVA U SVIM NJENIM SEGMENTIMA.

MEĐUNARODNA SARADNJA

PREDMETI RATNIH ZLOČINA

Uz podršku Evropske komisije i Razvojnog programa Ujedinjenih naroda (*UNDP*), u Sarajevu je 18. septembra 2023. godine održana regionalna konferencija tužilaca posvećena saradnji u predmetima ratnih zločina. Pored glavnih tužilaca iz zemlje domaćina i gostiju iz regiona, među kojima su predstavnici Državnog odvjetništva Republike Hrvatske, Tužilaštva za ratne zločine Republike Srbije i Vrhovnog državnog tužilaštva Crne Gore, o važnosti regionalne saradnje govorili su i glavni tužilac pri *MRMKS*-u, *Serge Brammertz*, kao i šef Delegacije EU u BiH, NJ.E. *Johann Sattler*.

Učesnici iz regiona razgovarali su o dosadašnjoj saradnji, poteškoćama u radu, kao i prijedlozima za rješavanje postojećih izazova. Razgovaralo se i o pomoći koju pruža *MRMKS* u vezi s pribavljanjem dokaza korištenih u postupcima u *Den Haagu*, kao i saradnji i razmjeni podataka u procesu traženja i identifikacije nestalih osoba. Osvrt na regionalnu saradnju u ovoj oblasti dao je i glavni tužilac Tužilaštva Brčko distrikta BiH Zekerija Mujkanović.



(Foto: Tužilaštvo Bosne i Hercegovine)

Segment regionalne saradnje u borbi protiv nekažnjivosti ratnih zločina izuzetno je značajan, jer u regionu postoji više stotina osumnjičenih osoba, koje se od pravde skrivaju u nekoj od zemalja regiona, a takođe na snazi su potrage i potjernice za velikim brojem osumnjičenih osoba.

S obzirom da se najveći broj predmeta odnosi na ratne zločine počinjene u BiH, pravosuđe BiH zainteresirano je da se regionalnom saradnjom spriječe mogućnosti bjekstva od sudskih procesa i omogući jačanje vladavine prava.

PERSPEKTIVE DRŽAVNE STRATEGIJE

O procesuiranju predmeta ratnih zločina razgovaralo se i početkom jula 2023. godine u Sarajevu na konferenciji glavnih tužilaca, koju je organiziralo Visoko sudsko i tužilačko vijeće BiH. Naglasak ove konferencije bio je na stanju i perspektivama provođenja Revidirane državne strategije za rad na predmetima ratnih zločina.



(Foto: VSTV)

U FOKUSU KONFERENCIJE BILO JE UTVRĐIVANJE KLJUČNIH PREPREKA I POTREBA TUŽILAŠTAVA U PROCESUIRANJU PREDMETA RATNIH ZLOČINA, KAO I PREDLAGANJE NEOPHODNIH MJERA KOJE ĆE OSIGURATI SVEOBUHVTAN PRISTUP I JEDNOOBRAZNO FUNKCIONIRANJE TUŽILAČKOG SISTEMA

Učešće u konferenciji, organiziranoj uz podršku Evropske Unije i operativnu koordinaciju Misije OSCE-a u BiH, uzeo je i glavni tužilac Tužilaštva Brčko distrikta BiH Zekerija Mujkanović, koji je i član Nadzornog tijela za provođenje Revidirane državne strategije za rad na predmetima ratnih zločina.

{NA NIVOU TUŽILAŠTVA DISTRIKTA TRENUTNO SU U RADU ISTRAŽNI PREDMETI MANJE SLOŽENOSTI OD KOJIH SE PRIORITETNO RJEŠAVAJU OTVORENE ISTRAGE PO POZNATOM OSUMNJIČENOM DOK SE, PORED ZASTUPANJA RANIJE PODIGNUTIH OPTUŽNICA PRED SUDOVIMA, INTENZIVNO RADI I NA RJEŠAVANJU SVIH SLUČAJEVA PO NEPOZNATNOM POČINIOCU}.



U periodu najintenzivnijeg rada na predmetima ratnih zločina, od 2004. g. do 2014. g, Tužilaštvo Distrikta procesuiralo je svih četrnaest osoba iz predmeta kojima je Međunarodni krivični tribunal za bivšu Jugoslaviju u Hagu dodijelio A oznaku složenosti.

14 = osoba iz predmeta oznake A
6 = pravosnažno osuđeno
31 = zbir godina zatvora

Procesuiranje četiri osobe ustupljeno je drugim nadležnim organima, dok su istrage protiv isto toliko osumnjičenih obustavljene. U skladu s tada važećom državnom strategijom za rad na predmetima ratnih zločina, procesuiranje tri osobe ustupljeno je Tužilaštvu Bosne i Hercegovine, a za jednu od njih krivično gonjenje s ove instance proslijeđeno je Tužilaštvu za ratne zločine Republike Srbije. Pravosuđu te zemlje, Tužilaštvo Distrikta ustupilo je procesuiranje jedne osobe.

U PREDMETIMA OZNAKE A, PRED BRČANSKIM PRAVOSUĐEM OSUĐENI SU
KOSTA KOSTIĆ (15 GODINA)
KONSTANTIN SIMONVIĆ (6 GODINA)
PERO RIKANOVIĆ (5 GODINA I 6 MJESECI)
MONIKA KARAN ILIĆ (2 GODINE I 6 MJESECI)
ALEKSANDAR OSTOJIĆ (1 GODINA)
DRAGAN ŽIVKOVIĆ (1 GODINA)



SVE OPTUŽNICE TUŽILAŠTVA DOSTUPNE SU NA WEB STRANICI OVE INSTITUCIJE

<https://it-brckodistriktbih.pravosudje.ba/vstvfo/B/117/kategorije-vijesti/8860/8869/8901> (FOTO: KONFERENCIJA O REVIDIRANOJ STRATEGIJI - VSTV)

REVIDIRANA DRŽAVNA STRATEGIJA ZA RAD NA PREDMETIMA RATNIH ZLOČINA USVOJENA JE 2020. G. S CILJEM DA UNAPRIJEDI PROCESUIRANJE PREDMETA RATNIH ZLOČINA U SUDOVIMA I TUŽILAŠTVIMA U BIH, POSEBNO KROZ ODGOVARAJUĆU RASPODJELU PREDMETA RATNIH ZLOČINA IZMEĐU PRAVOSUĐA NA NIVOU BIH, ENTITETA I DISTRIKTA BRČKO. ANEKSOM B STRATEGIJE PREDVIĐENO JE EFIKASNIJE PROCESUIRANJE NAJSLOŽENIJIH I NAJPRIORITETNIJIH PREDMETA RATNIH ZLOČINA, MEĐU KOJIMA SU PRIJE SVIH PREDMETI PROTIV LICA S A-LISTE PRAVILA PUTA, ODNOSNO PREDMETI S RANIJOM STANDARDNOM OZNAKOM A.

ORGANIZIRANI KRIMINAL ZAHTIJEVA KOORDINIRAN ODGOVOR



U Sarajevu je sredinom oktobra 2023. godine održan regionalni sastanak tužilaca posvećen izazovima u borbi protiv organiziranog, prekograničnog i međunarodnog kriminala, kao i radu na predmetima sa dokazima iz Sky i Anom aplikacija.

Domaćin sastanka organiziranog uz podršku Ambasade Velike Britanije bilo je Tužilaštvo Bosne i Hercegovine, a učestvovali su tužiocima iz BiH - s nivoa države, entiteta i Brčko distrikta, kao i tužiocima iz Crne Gore, Srbije, Hrvatske i Slovenije, uz učešće međunarodnih eksperata u borbi protiv organiziranog kriminala.

Praksa u borbi protiv organiziranog kriminala pokazala je da organizirane kriminalne grupe na području Zapadnog Balkana djeluju povezano na području više zemalja, te da ovakvi oblici kriminala zahtijevaju koordiniran odgovor, kao i dobru saradnju tužilaštava i agencija za provođenje zakona u zemljama regiona.

O organiziranom kriminalu i korupciji razgovaralo se i na godišnjoj konferenciji glavnih tužilaca tužilaštava u Bosni i Hercegovini, koju je 27. aprila ove godine, uz finansijsku podršku Delegacije EU u BiH/EUSR i Misije OSCE-a u BiH, organiziralo Visoko sudsko i tužilačko vijeće. Na ovoj konferenciji su predstavljeni rezultati rada tužilaštava

ostvareni u prošloj godini, kao i pokazatelji koji upućuju na određene trendove u radu tužilaštava, s posebnim osvrtom na korupciju i organizirani kriminal. U tom kontekstu prezentirana je revidirana metodologija Evropske unije za evidenciju krivičnih predmeta za najteža krivična djela i krivična djela visokog nivoa iz oblasti organiziranog kriminala i korupcije. Također, razmotreno je pitanje imenovanja i odgovornosti nosilaca tužilačkih funkcija, te važnost transparentnosti za tužilački sistem.



(Foto: Tužilaštvo Bosne i Hercegovine)

Usto, predstavljeni su nalazi i preporuke Misije OSCE-a u BiH o upravljanju postupkom u složenim predmetima, kao i saznanja iz monitoringa Misije OSCE-a u BiH o procesuiranju krivičnih djela koja ugrožavaju ispravnost i integritet izbornog procesa.

{Unutar Tužilaštva Brčko distrikta BiH ranije je određena kontakt tačka za saradnju s drugim tužilaštvima u BiH u procesuiranju organiziranog kriminala, uključujući i razmjenu informacija prikupljenih putem aplikacija Sky i ANOM. S druge strane, iskustva ovog tužilaštva u procesuiranju izbornih prevara služe kao primjer uspješne tužilačke prakse u zemlji, a kao koordinaciona kontakt tačka za saradnju određen je tužilac iz Odsjeka za organizirani kriminal, privredni kriminal i korupciju Pavo Radoš}.

O SISTEMSKOM ODGOVORU

INTERVJU

AMIRA BRKIĆ-ČEKIĆ



Glavni tužilac Mujkanović za Oslobodenje: Kvalitetni dokazi daju sigurnu osudu

INTERVJU | 21/10/2023 u 11:11 h



Bolje je da dajemo informacije, nego da se nagađa/Vahidin Mujagić

Glavni tužilac Tužilaštva Brčko distrikta Zekerija Mujkanović govori za Oslobodenje o odnosu sa policijom, istragama, te imunitetu sudija i tužilaca

TUŽILAŠTVO BRČKO DISTRIKTA JE SVIJETLI PRIMJER KADA JE RIJEČ O PROCESUIRANJU KRIVIČNIH DJELA I ONIH KOJI SU IH ČINILI. MNOGO STE USPIJEŠNIJI I EFIKASNIJI KADA JE U PITANJU DOKAZIVANJE KRIVIČNIH DJELA ZA RAZLIKU OD DRUGIH TUŽILAŠTAVA ČIJI TUŽITELJI TEŠKO DOKAŽU I NEKA OD NAJJEDNOSTAVNIJIH KRIVIČNIH DJELA. PO VAŠEM MIŠLJENJU, ŠTA JE RAZLOG TOME? DA LI SU TUŽITELJI NEDOVOLJNO OBUČENI, NESPREMNI...?

- Ovo tužilaštvo već dugo osigurava efikasnost po postupanju predmeta. Radi se o unutarnjem aktu ovog tužilaštva prema kojem je naloženo da u predmetima opšteg kriminaliteta mora biti postupanje tužitelja svaka dva mjeseca, odnosno u predmetima privrednog kriminala i korupcije svaka tri mjeseca mora biti verifikovano da tužilac poduzima istražne radnje. To

Nemamo Sky predmete. Da li će ih Tužilaštvo BiH kroz regularnu proceduru spustiti u našu nadležnost, vidjet ćemo

- Moguće je i radi se, ali se tada kreće od nule po prijavama građana ili iz sfere politike po krivičnim prijavama. Takve prijave obično imaju za rezultat političku borbu ili diskreditaciju političkih protivnika. Kada krećete od nule, teško je osigurati adekvatne dokaze i provesti istragu koja će rezultirati podizanjem optužnice. Kao i za sva druga djela, na primjer opšteg kriminala, najbolji su oni predmeti koji krenu od ovlaštenih službenih lica koja prikupljaju kvalitetne dokaze. Takvi izvještaji imaju ogromnu vjerovatnoću da rezultiraju dobrim optužnicama i na kraju pozitivnim sudskim odlukama.

osigurava efikasnost u postupanju i brzo dolaženje do tužilačke odluke. Kada je riječ o onome što dodatno utiče na rad predmeta, to su već utvrđeni standardi profesionalnog postupanja. Važan faktor je dobra, svakodnevna saradnja sa policijom i u radu na svakom predmetu. Ovo su sve mehanizmi koji osiguravaju kvalitetno i efikasno procesuiranje predmeta kojima se mi bavimo. Što se tiče drugih, teško je o tome govoriti i procjenjivati. To rade drugi organi. Oni bi trebali da sagledaju svoj rad i vide gdje je mogućnost za unapređenje takvog rada.

U MARTU STE KAZALI DA NE DOBIJATE DOVOLJNO POLICIJSKIH IZVJEŠTAJA KOJI BI DOPRINIJELE PODIZANJU OPTUŽNICA ZA KORUPCIJU I KRIMINAL, TE TRAZILI VEĆU PROAKTIVNOST I ANGAŽOVANOST U RADU POLICIJE. MNOGI SMATRAJU DA STE TO KAZALI KAKO BISTE OPRAVDALI TUŽILAŠTVO, TE DA SE MOŽE RADITI NA PREDMETIMA I ISTRAGAMA BEZ POLICIJSKIH IZVJEŠTAJA. DA LI JE TO ZAISTA I MOGUĆE, BUDUĆI DA GLAVNI DRŽAVNI TUŽILAC MILANKO KAJGANIĆ TVRDI DA NIJE?


RANIJE STE UKAZIVALI NA ČINJENICU DA BI TUŽILAŠTVA U NAŠOJ ZEMLJI KONAČNO TREBALA DA POČNU DA SE "MIJEŠAJU U SVOJ POSAO". KAKVA JE SADA SITUACIJA?

- Moramo svi podići profesionalnu odgovornost prema poslu koji obavljamo. Mi smo institucija koja radi u interesu društva i zajednice na kojoj postupamo, a naš (ne)uspjeh (ne) unapređuje tu zajednicu.

MNOGI TUŽITELJI GUBE SLUČAJEVE NAKON VIŠEMJESEČNOG SUĐENJA I ZA TO NE SNOSE (SKORO) NIKAKVE SANKCIJE. DA LI BI SE TREBALE UVESTI (STROŽIJE) KAZNE ZA NJIH, S OBZIROM NA TO DA SE NA VEĆINU TAKVIH SLUČAJEVA ULOŽI MNOGO NOVCA, A POTOM USLIJEDE I ODŠTETE KOJE OSLOBOĐENI NAPLAĆUJU IZ BUDŽETA BIH?

- Svugdje u svijetu je standard da sudije i tužitelji imaju imunitet za svoj rad. Ono što profesionalizam nalaže jeste povećana pažnja na predmetima koji su složeniji, koji mogu dovesti do takvih ishoda, kao i da se smanji mogućnost za donošenje oslobađajućih presuda. Ono što je meni poznato jeste da pravosuđe u BiH ima 94 procenta osuđujućih presuda, što je dosta visoko. Oslobađajućih presuda je uvijek bilo i bit će. Jer da nije tako, radilo bi se o totalnoj prolaznosti optužnica kroz sud, onako kako je to tužilaštvo predložilo. To bi tada otvorilo druga pitanja - koliko su sudovi objektivni, koliko štite prava svih učesnika u postupku, prije svega, optuženih. Ukoliko iza toga stoji nemar ili eventualno

počinjeno krivično djelo, onda ne važi ovo sve što sam rekao. Nego, ukoliko stoji eventualno umišljaj za donošenje takvih presuda ili odluka, onda to povlači odgovarajuću odgovornost.



[UZ OBAVEZUJUĆE UPUTSTVO O ODRŽAVANJU EFIKASNOSTI U PRAKSI SE REALIZIRA I UPUTSTVO O PROVOĐENJU FINANSIJSKE ISTRAGE, KAO I POSEBNI KRITERIJII ZA ZAKLJUČIVANJE SPORAZUMA O PRIZNANJU KRIVICE U PREDMETIMA ORGANIZIRANOG KRIMINALA I KORUPCIJE (op.a)]



PREMA REZULTATIMA ANALIZE TRANSPARENCY INTERNATIONALA I BIRN-A BIH, TUŽILAŠTVO BRČKO DISTRIKTA BIH JE IMALO NAJVIŠI INDEKS TRANSPARENTNOSTI (75). KAKO STE TO USPJELI I TRAŽE LI DRUGA TUŽILAŠTVA BILO KAKAV SAVJET OD VAS I TUŽILACA S KOJIMA RADITE? - Naše strateško opredjeljenje jeste veća otvorenost ka javnosti. Mi smo od 2001. prepoznali da je otvorenost ka javnosti jedan od načina da zadobijemo povjerenje. Naš je standard da u komunikaciji sa javnosti damo najviše što možemo.

[Pristup informacijama odobrava se u roku od tri, a odgovor na medijski upit, s izuzetkom primjene ZOSPI-a (uređivanje ili

umnožavanje obimne dokumentacije ili obrada statističkih podataka o kojima se ne vode evidencije), istog ili narednog dana. Obrazac zahtjeva za pristup informacijama dostupan je na <https://jt-brckodistriktbih.pravosudje.ba/vstvfo-api/vijest/download/51603> i prijemnom pultu, a u otvorenoj formi može se izraditi i na internetskoj platformi <https://indekspravosudja.ba/pravna-pomoc/> (op.a)]

OTVORENI PREDMETI - Ponekad, u interesu istrage, moramo reducirati informacije koje moramo dati, ali naš je standard da damo onoliko koliko možemo. Vidjet ćemo da li postoje i dodatne mogućnosti da budemo otvoreniji ka javnosti. Bolje da mi dajemo informacije, nego da se nagađa.

U SEPTEMBRU OVE GODINE JE BRČANSKO TUŽILAŠTVO POTPISALO SPORAZUM O SARADNJI S UREDOM ZA PREVENCIJU KORUPCIJE. DOGOVORENO JE DA ĆE URED PROSLJEĐIVATI TUŽILAŠTVU INFORMACIJE O BILO KOJIM SAZNAJIMA O KORUPTIVNIM AKTIVNOSTIMA, KAO I PRIJAVE ILI SADRŽINSKI SLIČNE PODNESKE ZAPRIMLJENE OD TREĆIH OSOBA, TE DRUGA SAZNAJNA KOJA PO PROCJENI UREDA MOGU KORISTITI TUŽILAŠTVU. DA LI JE BILO PRIJAVA? - Dobili smo više prijava od njih. Za neke smo već imali otvorene predmete, a za neke nismo i na osnovu tih prijava su otvoreni predmeti. To će rezultirati tužilačkim odlukama. U narednom periodu ćemo vidjeti koliko će to biti uspješno.

TUŽILAŠTVO NA ČIJEM STE ČELU JE PRIJE NEKOLIKO MJESECI, RADI EFIKASNIJEG PROCESUIRANJA NAPADA NA NOVINARE, ODREDILO TUŽITELJA ZA POSTUPANJE PO OVIM PRIJAVAMA. DA LI JE BILO PRIJAVA, U KOJOJ SU FAZI, KAKO SU RIJEŠENE? - Određen je tužitelj koji će raditi na ovim predmetima. Trenutno imamo prijavu da je napadnut urednik portala. Za taj slučaj smo osumnjičili tri osobe i prikupljamo dokaze.

REGIONALNA PLATFORMA ZA SARADNJU

Herceg Novi, Crna Gora, 16.5.2023.godine



Sredinom godine je u Herceg Novom, u Crnoj Gori, potpisan regionalni sporazum o saradnji vrhovnih tužilaštava iz država regiona Zapadnog Balkana i Slovenije u oblasti odnosa s javnošću. Cilj ovog memoranduma je omogućiti PR službenicima u tužilaštvima iz država potpisnica da intenziviraju saradnju u pravcu jačanja i unapređenja rada PR službi, razmjene iskustava i međusobnih konsultacija.

HIJERARHIJSKI NAJVIŠA TUŽILAŠTVA SLOVENIJE, SRBIJE, SJEVERNE MAKEDONIJE, ALBANIJE, CRNE GORE I BOSNE I HERCEGOVINE I NJENIH ENTITETA I DISTRIKTA BRČKO USAGLASILI SU USPOSTAVLJANJE REGIONALNE PLATFORME

PR SLUŽBI, KAO FORUMA ZA TRAJNU SARADNJU I KOMUNIKACIJU.

Domaćin svečane ceremonije potpisivanja memoranduma bilo je Vrhovno državno tužilaštvo Crne Gore, a delegaciju Tužilaštva Brčko distrikta BiH predvodio je zamjenik glavnog tužioca Vladimir Tepavčević.



U okviru aktivnosti potpisivanja memoranduma o saradnji vrhovnih tužilaštava iz država regiona Zapadnog Balkana i Slovenije u oblasti odnosa s javnošću, održana je i radionica o *NLP* menadžmentu za učesnike.

STRATEŠKI FORUM

Tužilaštvo Brčko distrikta BiH, 13.3.2023. godine bilo je domaćin 27. redovnog sastanka rukovodilaca tužilaštava i policijskih tijela u BiH, na strateškom nivou.

Redovnom sastanku u okviru Strateškog foruma prisustvovali su: glavni tužilac Tužilaštva BiH Milanko Kajganić, glavni federalni tužilac Federalnog tužilaštva FBiH Munib Halilović, v.d. glavni republički tužilac Republičkog javnog tužilaštva Republike Srpske Miodrag Bajić, direktor Državne agencije za istrage i zaštitu (SIPA) Darko Čulum, ispred Federalne uprave policije v.d. direktor Ensad Korman, direktor Ministarstva unutrašnjih poslova Republike Srpske Siniša Kostrešević, šef Policije Brčko distrikta BiH Goran Pisić, glavni tužilac Tužilaštva Brčko distrikta BiH Zekerija Mujkanović, te predstavnice projekta VSTV-a "Jačanje tužilačkih kapaciteta" Amila Rahić i Aleksandra Todorović.



UČESNICI STRATEŠKOG FORUMA POTPISALI SU SPORAZUM O USVAJANJU I PRIMJENI NOVOG UPUTSTVA O POSTUPANJU TUŽIOCA I OVLAŠTENOG SLUŽBENOG LICA U OTKRIVANJU KRIVIČNOG DJELA, POČINIOCA I SPROVOĐENJU ISTRAGE. NOVIM UPUTSTVOM O SARADNJI TUŽILAŠTAVA I POLICIJSKIH AGENCIJA, IZMEĐU OSTALOG, UNAPRIJEĐENA SU RJEŠENJA O OBAVJEŠTAVANJU TUŽIOCA O KRIVIČNIM DJELIMA.

Rad Strateškog foruma tužilaštava i policijskih agencija nastavljen je na sastanku u Banjoj Luci održanom 21.9.2023. godine, na kojem je razgovarano o praćenju preporuka iz Peer Review izvještaja. Zaključna sjednica ovog tijela u tekućoj godini održana je 1. decembra u Sarajevu, a razgovaralo se o predmetima organiziranog kriminala i korupcije i Izvještaju o napretku Bosne i Hercegovine za 2023. godinu.



(Foto: Tužilaštvo BiH)

UPUTSTVO O SARADNJI TUŽILACA S OVLAŠTENIM SLUŽBENIM LICIMA I PEER REVIEW PREPORUKE, U SKLADU S UPUTSTVIMA I NALOZIMA GLAVNOG TUŽIOCA TUŽILAŠTVA BRČKO DISTRIKTA BIH OBAVEZUJUĆI SU STANDARD INTERNOG POSTUPANJA.

Strateški forum kao oblik saradnje tužilaštava i policije realizira se u okviru Projekta „Jačanje tužilačkih kapaciteta u sistemu krivičnog pravosuđa“, kojeg implementira Visoko sudsko i tužilačko vijeće, konstatno potvrđujući dugoročnu efikasnost ujednačavanja stavova i razmjene najboljih praktičnih iskustava među uključenim institucijama.

LOKALNI OPERATIVNI OKVIR

Akcioni plan za provođenje Strategije za borbu protiv korupcije

NA OBOSTRANU INICIJATIVU, 29. SEPTEMBRA 2023. GODINE POTPISAN JE SPORAZUM O SARADNJI TUŽILAŠTVA DISTRIKTA I UREDA ZA PREVENCIJU KORUPCIJE I KOORDINACIJU AKTIVNOSTI NA SUZBIJANJU KORUPCIJE U BRČKO DISTRIKTU BOSNE I HERCEGOVINE.

Sporazumom o saradnji i razumijevanju, kojim se uređuje način postupanja i saradnje između strana potpisnica, potpisali su glavni tužilac Zekerija Mujkanović i direktor Ureda Žarko Ćosić.

U skladu sa sporazumom, Ured će prosljeđivati Tužilaštvu informacije o bilo kojim saznanjima o koruptivnim aktivnostima, kao i prijave ili sadržinski slične podneske zaprimljene od trećih osoba, ali i druga saznanja koja po procjeni Ureda mogu koristiti Tužilaštvu. S druge strane, o konačnoj tužilačkoj odluci po prijavama odnosno podnescima dostavljenim od strane Ureda, Tužilaštvo će obavijestiti Ured dostavljanjem odgovarajuće obavijesti i omogućiti uvid u svaki pravosnažno okončani predmet korupcije. Usto, radi sagledavanja rezultata međusobne suradnje i davanja prijedloga za njena poboljšanja, predviđeno je održavanje redovnih sastanaka glavnog tužioca i direktora Ureda.



Sporazumom s Uredom za suzbijanje korupcije institucionaliziran je okvir dugoročno održive saradnje lokalnih organa nadležnih za borbu protiv ovog oblika kriminaliteta. Pri tom, saradnja Tužilaštva s Policijom Distrikta kontinuirano se realizira putem strateškog i operativnih foruma za saradnju, na osnovu zakonskih propisa, obavezujućih uputstava o postupanju tužilaca i ovlaštenih službenih lica, te zajedničkih akcionih planova zasnovanih na strateškim odrednicama u radu uključenih institucija.

Intenziviranjem i konkretiziranjem saradnje sa svim nadležnim partnerskim institucijama, Tužilaštvo Distrikta potvrđuje potpunu posvećenost borbi protiv korupcije, kao jednom od glavnih institucionalnih ciljeva.



Akcioni plan za provođenje Strategije za borbu protiv korupcije u Brčko distriktu BiH, 2022–2024. godina, u okviru strateškog programa 2.2.3. predviđa - Jačanje saradnje Policije, Tužilaštva, Ureda i drugih organa u Distriktu u borbi protiv korupcije. Mjere i aktivnosti iz ovog dokumenta iz nadležnosti Tužilaštva integrisane su u Plan za unapređenje kvaliteta Tužilaštva, preuzimajući, nadograđujući i integrišući, kako interne upravljačke politike Tužilaštva, tako i eksterne smjernice, preporuke ili opredjeljenja VSTV-a i drugih regulatornih tijela.

STOP NASILJU

GREVIO PREPORUKE

Istanbulska i *Lanzarot* konvencija

OSVRT NA MEĐUNARODNI I REGIONALNI PRAVNI ODGOVOR

„16 DANA AKTIVIZMA PROTIV RODNO ZASNOVANOG NASILJA“

PODRŠKA SVJEDOCIMA

RODNA RAVNOPRAVNOST I ZABRANA
DISKRIMINACIJE

KAMPANJE ZA SIGURNO OKRUŽENJE

Konvencija Vijeća Evrope o prevenciji i borbi protiv nasilja nad ženama i nasilja u porodici (Istanbulska konvencija), usvojena je 11.05.2011. godine u Istanbulu, prvi je pravno obvezujući akt Vijeća Evrope u oblasti sprečavanja i borbe protiv nasilja nad ženama.

Ona ne mora biti direktno primjenjiva u državama potpisnicama, ali zahtijeva posebno prilagođavanje zakonskih i institucionalnih okvira potpisnica država radi njene uspješne implementacije. Bosna i Hercegovina je 07.11.2013. godine ratifikovala konvenciju, čime se obavezala na preduzimanje zakonskih i drugih mjera radi osiguranja pravnog, institucionalnog i organizacionog okvira za prevenciju nasilja nad ženama, zaštitu žrtava nasilja kao i kažnjavanje učinilaca nasilja.

Konvencija Vijeća Evrope o zaštiti djece od seksualnog iskorištavanja i seksualne zloupotrebe je usvojena dana 25.10.2007. godine u Lanzarotu (Lanzarot konvencija).

Svrha ove konvencije je spriječiti i suzbijati seksualno iskorištavanje i seksualnu zloupotrebu djece, zaštititi prava djece žrtava seksualnog iskorištavanja i seksualne zloupotrebe i unaprijediti nacionalnu i međunarodnu saradnju protiv seksualnog iskorištavanja i zloupotrebe djece. Konvencija je u Bosni i Hercegovini stupila na snagu 01.03.2013. godine.

S ciljem provođenja GREVIO preporuka, Istanbulske i Lanzarot konvencije, Pravosudna komisija Brčko distrikta BiH utvrdila je prijedlog Zakona o izmjenama i dopunama Krivičnog zakona Brčko distrikta BiH i dostavila ga u daljnju proceduru usvajanja.

Prijedlog Zakona izradila je radna grupa, u sastavu: Srđan Nedić, sudija Apelacionog suda Brčko distrikta BiH, Nebojša Savić, sudija Osnovnog suda Brčko distrikta BiH, Gordana Radovanović, tužiteljica Tužilaštva Brčko distrikta BiH i Merima Mujkić, stručna saradnica za pravne poslove i evropske integracije Pravosudne komisije.



TEME

GREVIO PREPORUKE

Istanbulska i Lanzarot konvencija

Trenutno je u BiH pojačana svijest o potrebi sistemskog i brzog reagovanja kroz unapređenje javnih politika, normativnog okvira i institucionalnih praksi, podstaknuta recentnim slučajevima femicida. Bosna i Hercegovina je poduzela određene zakonodavne i druge mjere i postigla određeni napredak u oblasti sprečavanja i suzbijanja nasilja nad ženama i nasilja u porodici. Napredak uključuje, između ostalog, određene zakonske izmjene u oblasti krivičnog prava kako bi se krivična djela predviđena Konvencijom Vijeća Evrope o sprječavanju i borbi protiv nasilja nad ženama i nasilja u porodici ugradila u pravni okvir.

BILTEN

ZA VIDLJIVOST PRAVDE

S ciljem procjene implementacijskih mjera koje poduzimaju vlasti u Bosni i Hercegovini u odnosu na sve aspekte Istanbulske konvencije, Grupa eksperata za djelovanje protiv nasilja nad ženama i nasilja u porodici (GREVIO) je analizirala stanje u BiH i sačinila Izvještaj za Bosnu i Hercegovinu, koji je usvojen sredinom 2022. godine. U GREVIO Izvještaju je, pored ostalog, ukazano na nedostatke normativnog okvira, mehanizama međuinstitucionalne saradnje, sistemske propuste u edukativnim programima i sadržajima usmjerenih ka senzibilizaciji i osposobljavanju profesionalaca u lancu zaštite, te ključnom nedostatku implementacije postojećeg zakonodavstva.



Jedan od ključnih nalaza iz Izvještaja za Bosnu i Hercegovinu Evropske komisije je da rodno zasnovano nasilje i dalje izaziva zabrinutost.

Pravosuđe Brčko distrikta BiH već je preduzelo mjere koje se odnose na primjenu GREVIO preporuka kroz usklađivanje krivičnog zakonodavstva. Na sjednici održanoj u mjesecu oktobru 2023. godine Pravosudna komisija Brčko distrikta BiH usvojila je prijedlog Zakona o izmjenama i dopunama Krivičnog zakona Brčko distrikta BiH, kojim se vrši usklađivanje ovog zakona sa Istanbulskom i Lanzarot konvencijom. Prijedlog je dostavljen Skupštini Brčko distrikta BiH na postupak razmatranja i usvajanja.

Pored toga, Tužilaštvo ukazuje na neodložnu potrebu uspostavljanja efikasnijih zaštitnih mehanizama za žrtve nasilja. Inicijative Tužilaštva u pravcu redefiniranja odredbi Zakona o zaštiti od nasilja u porodici i lokalnih koordinacionih mehanizama usmjerene su na adekvatniji odgovor kompletnog društva na sve oblike nasilja, uz sagledavanje vlastitih institucionalnih mogućnosti za efikasnijim djelovanjem.

OSVRT NA MEĐUNARODNI I REGIONALNI PRAVNI OKVIR

Seminar namijenjen daljnjem stručnom usavršavanju i specijalizaciji tužilaca za rad na predmetima nasilja u porodici, pod nazivom „Iskustva i izazovi procesuiranja s osvrtom na regionalni i međunarodni pravni odgovor“, održan je na Jahorini 23. i 24. oktobra 2023. godine.



S osvrtom na normativni okvir i mogućnosti unapređenja zakonskih rješenja, a naročito na praktične primjere iz kojih mogu izvući važne profesionalne pouke, tužiocima su imali priliku neposredno razmijeniti iskustva, važne informacije i stavove struke o brojnim aktuelnim pitanjima. Presjek stanja uz studije slučaja, analize obustavljenih istraga, nacrt Zakona o zaštiti od nasilja u porodici i nasilja nad ženama u RS-u, praksa Evropskog

suda za ljudska prava, praksa i izazovi u radu tužilaštava - prostor za unapređenje, samo su neke od tema koje su ovom prilikom bile u fokusu edukacije tužilaca.

Seminar o nasilju u porodici organizirao je Centar za edukaciju sudija i tužilaca u RS-u, a budući da se susreću s istovjetnim izazovima kao i kolege iz drugih dijelova BiH, tužiteljice Dejana Jovanović, Gordana Radovanović i Dijana Azapagić, iz Tužilaštva Brčko distrikta BiH, svojim učešćem unaprijedile su važna stručna znanja iz ove oblasti.



Održan u aktuelnom trenutku koji zahtijeva odlučan i apsolutni odgovor sistema na ovu vrstu rastućeg kriminaliteta, koji se u posljednje vrijeme manifestuje u posebno teškim oblicima, ovaj dvodnevni seminar okupio je tužioce iz oba bh. entiteta i distrikta Brčko.

„16 DANA AKTIVIZMA

PROTIV RODNO ZASNOVANOG NASILJA“



U okviru kampanje „16 dana aktivizma protiv rodno zasnovanog nasilja“, koja se obilježava svake godine u periodu od 25. novembra do 10. decembra, u Brčkom je 1. decembra održan okrugli sto na temu „Institucionalni okvir za ravnopravnost spolova na nivou Brčko Distrikta“.

Učesnici događaja iz izvršne, zakonodavne i sudske vlasti razgovarali su o efikasnosti postojećih politika i institucionalnog okvira za ravnopravnost spolova na nivou distrikta Brčko, kao i mogućnostima donošenja novih ili

unapređenja postojećih mehanizama za ravnopravnost spolova. Usto, nastavljen je dijalog s predstavnicima civilnog društva o postojećim mjerama, te uspostavljanju i promovisanju novih mehanizama za prevenciju, suzbijanje i zaštitu žena žrtava nasilja, s posebnim osvrtom i na žrtve seksualnog uznemiravanja.

Učesnici su diskutovali o jačanju sistema i održivosti mehanizama za postizanje rodne ravnopravnosti, a posebna pažnja posvećena je Akcionom planu za poboljšanje položaja žena i unapređenje rodne ravnopravnosti u Brčko distriktu BiH za period 2021 -2025. godine. Ciljevi i aktivnosti iz Akcionog plana kao i primjena ovog dokumenta u smislu efikasnosti postojećih institucionalnih mehanizama, prevencija i suzbijanje nasilja nad ženama u porodici i zaštita žrtava nasilja, s razlogom su bile u fokusu ovog događaja.

S obzirom na nezamjenjivu ulogu u osiguravanju krivične zaštite od nasilja u porodici i nasilja nad ženama, tužiteljica Tužilaštva Brčko distrikta BiH Gordana Radovanović predstavila je pokazatelje rada ovog tužilaštva u prethodnim godinama, ukazavši na neodložnu potrebu uspostavljanja efikasnijih zaštitnih mehanizama za žrtve nasilja. Ona je podsjetila na inicijative Tužilaštva u pravcu redefiniranja odredbi Zakona o zaštiti od nasilja u porodici i lokalnih koordinacionih mehanizama, koje su usmjerene na adekvatniji odgovor kompletnog društva.



U okviru iste kampanje, Tužilaštvo je uzelo učešće i u projektu „Prevencija i osnaživanje protiv rodno zasnovanog nasilja u intimnim vezama mladih“, čija je svrha informisanje i senzibilizacija mladih o problemu nasilja u porodici, nasilja nad

ženama, te nasilja u adolescentskim vezama. Opći cilj projekta je doprinijeti informisanosti učenika srednjih škola o prihvatljivim i neprihvatljivim oblicima ponašanja, radi lakšeg prepoznavanju nasilja u partnerskim vezama mladih. Dugoročni cilj projekta je sticanje znanja o teorijskim konceptima, vrstama, mehanizmima, dinamici, rasprostranjenosti i posljedicama nasilja u porodici i nasilja nad ženama.



Okrugli sto na ovu temu održan je 8. decembra u Brčkom na kojem su učenici srednjih škola upoznati s institucionalnim mehanizmima koji se bave tematikom nasilja.

Kao praktičar s bogatim višegodišnjim iskustvom u procesuiranju nasilja, učešće u ovom okruglom stolu uzela je tužiteljica Dejana Jovanović.



[TUŽILAŠTVO DISTRIKTA BRČKO JEDNA JE OD ČETIRI PRAVOSUDNE INSTITUCIJE U ZEMLJI, KOJE SU PRVE ZAPOČELE IMPLEMENTACIJU DRŽAVNE STRATEGIJE ZA UNAPREĐENJE RODNE RAVNOPRAVNOSTI. ISKUSTVA U PROVOĐENJU STRATEGIJE STEČENA U PRVOJ FAZI IMPLEMENTACIJE U TUŽILAŠTVOU DISTRIKTA, KANTONALNOM TUŽILAŠTVOU KANTONA SARAJEVO, KANTONALNOM SUDU U SARAJEVU I OSNOVNOM SUDU U BIJELJINI PREDSTAVLJENA SU KAO PRIMJER DRUGIM SUDOVIMA I TUŽILAŠTVIMA U BIH].

Eventualnu diskriminaciju od strane zaposlenih u ovoj instituciji, građani mogu prijaviti putem adresa prijavadiskriminacije@jtbd.ba i prituzbe@jtbd.ba, a svoja iskustva u odnosu i komunikaciji s Tužilaštvom mogu iznositi i putem ankete na internetskoj i facebook stranici ove institucije.



PODRŠKA SVJEDOCIMA

S ciljem unapređenja i daljnijeg jačanja podrške svjedocima i žrtvama nasilja, uključujući naročito žene pogođene seksualnim nasiljem, Tužilaštvo Brčko distrikta nastavilo je saradnju s organizacijama civilnog društva koje se bave zaštitom i unapređenjem njihovog položaja. Nakon aktivnog učešća tužilaca u edukativnim aktivnostima o pravnom položaju žena pogođenih ratnim seksualnim i rodno zasnovanim nasiljem na Zapadnom Balkanu, 1.7.2021. godine upriličeno je potpisivanje sporazuma o daljnjoj međusobnoj saradnji Tužilaštva i udruženja Vive Žene iz Tuzle.



Sporazumom između dvaju važnih aktera u osiguranju održive, adekvatne i dugoročne podrške žrtvama, odnosno svjedocima, kojeg je su potpisali glavni tužilac Tužilaštva Zekerija Mujkanović i predsjednica Udruženja Jasna Zečević, definirane su dodatne aktivnosti u pravcu ostvarivanja zajedničkih ciljeva. Radi osiguranja podrške ženama koje su preživjele seksualno nasilje u ratu, saradnjom su prije svega obuhvaćeni predmeti ratnih zločina, a u skladu s potrebama saradnja će se odnositi i na druge vrste krivičnih djela.

PROTOKOL O SARADNJI U OBLASTI PRUŽANJA PODRŠKE SVJEDOCIMA

Još 2013. godine Tužilaštvo Brčko distrikta BiH zaključilo je s Policijom Brčko distrikta BiH Protokol o saradnji u oblasti pružanja podrške svjedocima, koji ima za cilj da obezbijedi odgovarajuću psihološku podršku i pomoć svjedocima u fazi sprovođenja istrage, te da se pružanjem profesionalnih usluga izbjegne mogućnost da davanje iskaza izazove dodatne negativne posljedice, novu patnju ili traumu svjedocima. Podrška je primarno usmjerena prema djeci i maloljetnicima, svjedocima pod prijetnjom, ugroženim i zaštićenim svjedocima, svjedocima sa fizičkim, psihičkim ili psihofizičkim poteškoćama, ali i drugim svjedocima prema iskazanim potrebama, a naročito žrtvama, a osigurava se angažiranjem stručnog saradnika - psihologa zaposlenog u Policiji Brčko distrikta BiH.

KAMPANJE ZA SIGURNO OKRUŽENJE

POŠTUJ ŽIVOT, NE ORUŽJE!

<https://youtu.be/zpCLpSz5DO4?list=PLDB3j8leGjINmXU2p26XYMm5q6X9C50w2>

Tužilaštvo Brčko distrikta BiH pridružilo se kampanji „POŠTUJ ŽIVOT, NE ORUŽJE“, koja je na teritoriji cijele BiH pokrenuta 25. septembra 2023. godine, kao odgovor na veliki broj incidenata uzrokovanih vatrenim oružjem sa tragičnim posljedicama koji su se dogodili u bliskoj prošlosti. Cilj kampanje je podizanje svijesti javnosti o opasnostima posjedovanja vatrenog oružja i teškim posljedicama po život i zdravlje ljudi, ali i poziv na konkretnu opću akciju kako bi se spriječili slučajevi upotrebe oružja, te prevenirao i smanjio posjed nelegalnog oružja u Bosni i Hercegovini.



Vatrenim oružjem počini se više od polovine ubistava u BiH, od čega se u 95 posto slučajeva koristi nelegalno oružje!

U skladu sa Zakonom o oružju i municiji Brčko distrikta Bosne i Hercegovine, građani su pozvani da Policiji Brčko distrikta Bosne i Hercegovine dobrovoljno predaju minsko eksplozivna sredstva, oružje i municiju zaostalu iz ratnog perioda, pozivom na brojeve telefona **122** ili **049/233-200**.

Građani koji dobrovoljno predaju navedeno oružje biće amnestirani od sankcija, ukoliko protiv njih već nije pokrenut postupak zbog nedozvoljenog držanja minsko eksplozivnih sredstava, oružja i municije.

Svaka šesta smrt u Bosni i Hercegovini povezana sa vatrenim oružjem posljedica je nesretnog slučaja, dok se vatrenim oružjem počini više od polovine ubistava u Bosni i Hercegovini, od čega se u 95 posto slučajeva koristi nelegalno oružje. Posebno zabrinjava činjenica da se ubistva povezana sa vatrenim oružjem najčešće dešavaju u privatnim prostorima, a svako drugo ubistvo se desilo u kući, stanu ili dvorištu žrtve. Ubistva počinjena u krugu porodice čine skoro trećinu svih ubistava, što znači da je svaku četvrtu osobu ubijenu u Bosni i Hercegovini ubio član porodice. Nažalost, žene su primarne žrtve, a dvije trećine svih ubijenih žena ubiju članovi porodice. Skoro 40 posto ubistava žena počinjeno je vatrenim oružjem, neke su od

činjenica na koje se upozorava kroz sveobuhvatnu kampanju.

Kampanja skreće pažnju da nedozvoljeno posjedovanje vatrenog oružja predstavlja značajan rizik za sigurnost građana i građanki u Bosni i Hercegovini, te poziva na dobrovoljnu predaju nelegalnog oružja. Kampanja je podržana kroz projekat „Prevenција i smanjenje posjeda nelegalnog oružja u BiH“, kojeg finansiraju Njemačka, Nizozemska, Švedska, Francuska, Ujedinjeno Kraljevstvo i Norveška, uz podršku Evropske unije, kroz Multilateralni povjerilački fond Ujedinjenih nacija (MPTF), a provodi ga UNDP.


TEMELJI DEMOKRATIJE

SLOBODNO INFORMISANJE

U povodu 2. novembra, Svjetskog dana borbe protiv nekažnjivosti zločina nad novinarima, članice mreže *SafeJournalists* pokrenule su kampanju [#NeOklijevajPrijavi](#), čiji je cilj podizanje svijesti o problemu nekažnjivosti napada na novinara, kao i da se novinari ohrabre i prijave sve vrste napada koji su u vezi sa njihovim radom.



TUŽILAŠTVO BRČKO DISTRIKTA BiH PRIDRUŽILO SE KAMPANJI ISTIČUĆI DA JE EFEKTIVNA I EFIKASNA KRIVIČNOPRAVNA ZAŠTITA NOVINARSTVA, SIGURNOST NOVINARA I OSTALIH MEDIJSKIH AKTERA, TE GENERALNO SVIH OSOBA KOJE DOPRINOSU JAVNOJ DEBATI, OD KLJUČNOG ZNAČAJA ZA VLADAVINU PRAVA I SLOBODU IZRAŽAVANJA, KAO TEMELJNE STUBOVE DEMOKRATSKOG DRUŠTVA.



Među prvim tužilačkim institucijama u zemlji, ovo tužilaštvo uredilo je poseban način postupanja po prijavama krivičnih djela počinjenih na štetu novinara, urednika, medijskih radnika, kao i svih osoba koje obavljaju poslove od javnog značaja u oblasti informisanja. U okviru posebne procedure prioritarnog tretiranja ovih krivičnih djela, imenovan je tužilac za postupanje po prijavama, a uređeno je i vođenje posebne evidencije o krivičnim djelima počinjenim na štetu medijskih radnika.

r.ivanovic@jtbd.ba 049/217-227 062/020-846

Kao kontakt osoba Tužilaštva za komunikaciju i koordinaciju sa novinarskim udruženjima, te agencijama za provođenje zakona koje rade na otkrivanju i gonjenju takvih krivičnih djela određen je tužilac Radmilo Ivanović.

Uz veliko tužilačko iskustvo, tužilac Ivanović posjeduje i bogato iskustvo u radu s medijima, kao i višegodišnju praksu u međunarodnim organizacijama za zaštitu ljudskih prava.

ZA



INTEGRITET IZBORA



U cilju unapređenja zaštite izbornog procesa u BiH, u Brčkom je 27. i 28. novembra održan okrugli sto namijenjen jačanju integriteta izbornog procesa i institucionalnih kapaciteta za njegovu zaštitu. Dvodnevni događaj posvećen ključnim aspektima zaštite izbornog procesa na jednom mjestu okupio je predstavnike tužilaštava s razvijenom praksom procesuiranja izbornih prevara, Centralne izborne komisije BiH i drugih uključenih aktera. Učesnici su još jednom potvrdili važnost efikasnosti međusobne saradnje i uključenosti lokalnih izbornih komisija, policijskih agencija i drugih aktera,

uključujući nevladine organizacije, medije i građane.

Okrugli sto kojeg je organizirala Koalicija „Pod lupom“, a podržala i Misija OSCE-a, u značajnoj mjeri bio je posvećen ulozi tužilaštava u procesuiranju izbornih prevara i krivičnih djela u izbornom procesu. Tužioci iz Tužilaštva Brčko distrikta BiH, Okružnog javnog tužilaštva u Doboju i Kantonalnog tužilaštva Kantona Sarajevo predstavili su iskustva iz tužilačke prakse dajući uvid u konkretne slučajeve i izazove s kojima se susreću, dok su sudije Osnovnog suda Brčko distrikta BiH ukazali na relevantnu sudsku praksu u ovoj oblasti. S obzirom na to da tužilaštva imaju značajnu ulogu u osiguravanju slobodnih i poštenih izbora, te jednu od ključnih funkcija u zaštiti integriteta izbornog procesa, tužilac Pavo Radoš iz Tužilaštva Distrikta, kao koordinaciona kontakt tačka, iznio je pokazatelje rada ovog tužilaštva u vezi s lokalnim izborima provedenim 2020. godine.

Prema statističkim pokazateljima, ovo tužilaštvo formiralo je 11 predmeta iz kojih je podiglo optužnice protiv 15 osoba. Njih 13 do danas je pravosnažno osuđeno, u jednom predmetu donesena je oslobađajuća presuda, dok je u jednom slučaju suđenje u toku.



Pred pravosuđem Distrikta Brčko osuđen je veliki broj osoba iz političkog miljea, među kojima su skupštinski zastupnici i drugih javni zvaničnici, kao i predsjednici političkih partija i brojni stranački aktivisti. Najčešće su procesuirani za krivična djela: Pripremanje krivičnog djela i Udruživanje radi počinjenja krivičnog djela u vezi s krivičnim djelom Prijevara pri glasanju, te za krivična djela Povreda slobode odlučivanja birača i Davanje i primanje dara ili drugog oblika koristi za trgovinu uticajem. Najčešći načini izvršenja ovih krivičnih djela bili su: pribavljanje kopije ličnih dokumenta trećih osoba i njihovo lažno prijavljivanje za glasanje van BiH, nuđenje na prodaju i direktna kupovina glasova, kao i nuđenje raznih usluga od strane visokopozicioniranih zvaničnika za pribavljanje glasova ili kopija dokumenata trećih osoba.

[TUŽILAŠTVO ZAHVALJUJE GRAĐANIMA I ISTRAŽIVAČKIM MEDIJIMA NA SARADNJI S NADLEŽNIM INSTITUCIJAMA U OTKRIVANJU KRIVIČNIH DJELA U VEZI S PROVOĐENJEM IZBORNOG PROCESA 2020. GODINE. ZAJEDNO S POLICIJOM BRČKO DISTRIKTA BIH I IZBORNOM KOMISIJOM DISTRIKTA, POZIVAMO SVE DRUŠTVENE AKTERE DA I UBUĐUĆE PRIJAVE SVAKI SLUČAJ PROTIVZAKONITOG UTICAJA NA IZBORNU VOLJU GRAĐANA ILI BILO KOJU DRUGU IZBORNU NEPRAVILNOST ZA KOJU SAZNAJU].

O procesuiranju izbornih prevara i institucionalnim pripremama za lokalne izbore 2024. godine, tužilac Radoš govorio je za Radio Brčko 4. decembra 2023. godine, u okviru emisije posvećenoj ovoj temi. Emisija je dostupna na platformama Radija Brčko.



TRANSPARENTNOST


Transparentnost, kao principijelan odnos prema interesu javnosti da bude upoznata sa ključnim informacijama o radu pravosuđa, oživotvoruje se kroz tačne, provjerene i ažurne informacije o radu Tužilaštva, lako dostupne informacije građanima u pogledu načina rada pravosudnih organa i načina ostvarivanja prava, te kroz kontinuiranu i otvorenu komunikaciju sa medijima, nevladinim organizacijama i drugim subjektima koji imaju legitiman interes da budu informirani o radu pravosuđa, kao i kroz kvalitetne i jasno obrazložene tužilačke i sudske odluke.

Cilj: Sve akcije koje Tužilaštvo preduzima u pogledu efikasnosti, efektivnosti, kvaliteta, nezavisnosti i integriteta, za rezultat imaju unapređenje povjerenja građana u rad Tužilaštva i pravosuđa u cjelini.

Tokom konferencije *Transparency Internationala* u BiH i *BIRN-a* BiH o stanju u pravosuđu, održanoj 13. jula u Sarajevu, predstavljena je online platforma "Indeks pravosuđa", koja sadrži rezultate indeksa transparentnosti sudova i tužilaštava u BiH, kao i informacije o predmetima korupcije i organiziranog kriminala.

Prema rezultatima analize TI-a i BIRN-a, među tužilaštvima u BiH, Tužilaštvo Brčko distrikta BiH ostvarilo je najveći opći indeks transparentnosti, 75. Indeks proaktivne transparentnosti ovog tužilaštva iznosi 29/52, transparentnost prema medijima ocijenjena je sa 16, od maksimalno mogućih 18 indeksnih poena, dok su najbolji rezultati ovog tužilaštva ostvareni na polju reaktivne komunikacije, u primjeni Zakona o slobodi pristupa informacijama, 30 od 30.

{Tužilaštvo Distrikta s jednakom efikasnošću i na najpristupačniji način dostavlja informacije građanima i svim zainteresiranim subjektima}.



U okviru monitoringa transparentnosti pravosuđa tretirana su četiri segmenta: koliko institucije objavljuju informacija na internet stranicama, kako odgovaraju na obične upite medija, kako reaguju na upite po Zakonu o slobodi pristupu informacijama i kako odgovaraju građanima.




Govoreći tim povodom za *TV Justice*, glavni tužilac Zekerija Mujkanović istakao je, između ostalog, da će analiza *BIRN*-a i *Transparency International* biti upotrijebljena za daljnje unapređenje rada ove institucije u oblastima na koje se odnosi. Parametri koji su korišteni za ovu analizu već su uvršteni u Plan unapređenja kvaliteta i transparentnosti ovog tužilaštva, s maksimalnim vrijednostima kao zadatim indikatorima.

Analiza transparentnosti pravosuđa dostupna je na <https://indekspravosudja.ba/>, a emisija *TV Justice* posvećena ovoj temi, kao i procesuiranju korupcije u BiH, trajanju sudskih postupaka i disciplinskim predmetima pred VSTV-om na <https://www.youtube.com/watch?v=Y98MTTeAVk0>.


KONTINUIRANI MONITORING U ORGANIZACIJI VSTV-a

Visoko sudsko i tužilačko vijeće BiH, kroz projekat "Jačanje tužilačkih kapaciteta", već nekoliko godina vrši praćenje i mjerenje rezultata rada tužilaštava u oblasti odnosa s javnošću. Prema utvrđenim rezultatima Tužilaštvo Brčko distrikta BiH u ovoj oblasti u prošloj godini ostvarilo je, kao i ranijih godina, izvanrednu ocjenu. Po kriteriju kvantiteta objavljenih informacija, ovom tužilaštvu dodijeljeno je maksimalnih 35 poena. Kao mjerljivi kvantitativni indikatori primijenjeni su: količina objavljenih izvjava za medije, saopćenja za javnost, optužnica i drugih informacija na web stranici, procenat riješenosti medijskih upita i zahtjeva za slobodan pristup informacijama, broj korištenih komunikacionih kanala, kao i broj posjeta korisnika službenoj web stranici Tužilaštva <http://it-brckodistriktbih.pravosudje.ba>.



S druge strane, po kriteriju kvaliteta ostvarena je ocjena od 23,70 (od maksimalnih 25) poena, što je najviša ocjena data jednom tužilaštvu od strane stručnog i nezavisnog ocjenjivačkog tijela. Za ocjenu kvaliteta korišteni su kriteriji: sadržajnost i razumljivost informacija, pravovremenost i dostupnost informacija, objektivnost i tačnost informacija, proaktivnost u odnosima s javnošću i rodno senzitivni govor.

(A17) Tužilaštvo Brčko Distrikta	1.	4	5	5	4	5	4,60	23,70
	2.	4	5	5	4	5	4,60	
	3.	5	5	5	4	5	4,80	
	4.	5	5	5	4	4	4,60	
	5.							
	6.	5	5	5	5	5	5,00	
							23,60	
							23,80	
							23,60	
							23,60	23,7



U okviru ovog projekta, u realizaciji Udruženja glasnogovornika tužilaštava u BiH, krajem prošle godine je u Brčkom, kao i drugim sredinama, održana obuka za tužioce o jačanju vještina javnog nastupa. Izjave, intervjui, press-konferencije i druge tehnike komunikacije s javnošću, koje su bile u programu dvodnevne obuke, nezamjenjiv su način za pojašnjenje tužilačke uloge u pravosudnom sistemu.

Praksa javnih istupa: Za magazin Mreža Federalne televizije glavni tužilac Zekerija Mujkanović i tužilac Pavo Radoš govorili su o slučaju "Novi Bimeks", optužnici za 22 miliona KM štete za ovo brčansko preduzeće. Emisija od 9.2.2021: <https://www.youtube.com/watch?v=NrXZeZbZwKw> (39:54-50:23 min).

Prilog Mreže od 12.10.2021. godine o korupciji-akcija Sistem: <https://federalna.ba/mreza-12102021-nyjbo> (1:12-11:00 min).

PRIZNANJE MISIJE USAID-a u BiH

Tužilaštvo Brčko distrikta BiH nosilac je prošlogodišnjeg priznanja za poseban doprinos

transparentnosti pravosuđa u BiH, koje je za službenike za odnose s javnošću u pravosudnim institucijama prvi put dodijelila Misija *USAID-a* u BiH, u okviru projekta Pravosuđe protiv korupcije - *JACA*. Nakon rangiranja i ocjene pristiglih prijava od strane posebnog stručnog žirija Projekta, priznanje za poseban doprinos transparentnosti pravosuđa u 2022. godini dodijeljeno je Samiru Beganoviću, sekretaru i službeniku za odnose s javnošću Tužilaštva Brčko distrikta BiH.

Priznanje je dodijeljeno na osnovu mišljenja stručnog žirija, koji je prilikom izbora ocjenjivao nekoliko različitih aspekata njihovog rada, među kojima su: javni nastup glasnogovornika, kvalitet saopćenja za javnost i objave na web stranici pravosudne institucije. U obzir je takođe uzeto i da li pravosudna institucija ima usvojenu institucionalnu komunikacijsku strategiju, te da li koristi društvene mreže kao kanal komuniciranja.



Naglasivši da je cilj ove aktivnosti ukazati na važnost kvalitetnog informisanja javnosti, što je presudno za vraćanje povjerenja javnosti u sektor pravde, te na nezamjenjivu ulogu koju glasnogovornici imaju u tom procesu, priznanje Beganoviću dodijelila je direktorica Misije *USAID-a* u BiH *Courtney Chubb*. Istaknuto je da Vlada SAD-a vjeruje da je, bez

obzira na izazove koji postoje u sektoru pravde u BiH, otvorena i transparentna komunikacija s javnošću ključna u borbi protiv korupcije i vraćanje povjerenja javnosti u sektor pravde u BiH. Cilj organizatora bio je nagraditi glasnogovornike koji su napravili pozitivan iskorak u oblasti jačanja transparentnosti, kao i motivirati sve službenike za odnose s javnošću pravosudnih institucija da budu efikasniji u budućem radu. Pored toga, cilj je bio i promovirati važnost kvalitetnog i pravovremenog informisanja javnosti, kao i stvoriti poticaj za proaktivan pristup.

ZA SOLIDARNOST



Dan ružičaste vrpce



Dan ružičaste vrpce humanitarna je akcija čiji je glavni cilj upozoriti na važnost ranog otkrivanja raka dojke, jer se 90% oboljelih žena može izliječiti ako se bolest otkrije u početnom stadiju.

Još jednu društveno odgovornu akciju humanitarnog udruženja Brčansko srce provedenu na Trgu mladih u Brčkom, na simboličan način podržali su i članovi kolektiva Tužilaštva Brčko distrikta BiH, nakon čega su predstavnice Udruženja posjetile ovu pravosudnu instituciju. Predsjednica Udruženja Ramiza Musić izrazila je zahvalnost glavnom tužiocu Zekeriji Mujkanoviću, kao i kolektivu kojim rukovodi, za nesebičnu podršku njihovom radu, ističući to kao važan primjer društvene osjetljivosti i odgovornosti. U tom smislu, Musić je u ime Udruženja Brčansko srce glavnom tužiocu uručila prigodnu zahvalnicu.



U iskrenom i otvorenom razgovoru o izazovima s kojima se u radu susreću članice i članovi Udruženja, glavni tužilac Mujkanović naglasio je važnost njihovog aktivnog djelovanja, ali i značaj najšire društvene podrške općekorisnim i humanitarnima akcijama kakve priređuju dugi niz godina. Mujkanović se dragim gošćama toplo zahvalio na posjeti, kao i na dodijeljenoj zahvalnici.


TUŽILAŠTVO KAO POZIV

Početak aprila u prostorijama Visokog sudskog i tužilačkog vijeća održana je svečana ceremonija u povodu imenovanja nosilaca pravosudnih funkcija. Svečanu ceremoniju predvodio je član Predsjedništva VSTV-a Sanin Bogunić, a pored ostalih nosilaca pravosudnih funkcija, svečanu zakletvu pred VSTV-om položila je i Dijana Azapagić, novoimenovana tužiteljica Tužilaštva Brčko distrikta BiH.



Prije imenovanja, Azapagić se iskazala na poslovima stručne saradnice u Tužilaštvu Brčko distrikta, a neposredno prije izbora za tužiteljicu obavljala je advokatske poslove u Kancelariji za pravnu pomoć Brčko distrikta BiH. Na tužilačku funkciju u Odsjeku za ratne zločine stupila je 10. aprila 2023. godine.

Amira Imamović: od početka dio našeg tima



Povodom odlaska u penziju, u Tužilaštvu je održana prigodna svečanost i kolegijalni ispraćaj dugogodišnje službenice ovog tužilaštva Amire Imamović.

Naglasivši značaj i vrijednost posla koji je tokom karijere više nego uspješno obavljala i u koji je nesebično utkala više od polovine radnog vijeka, glavni tužilac Zekerija Mujkanović čestitao je službenici Imamović ovaj važan životni i profesionalni trenutak.

Poslove šefice administracije obavljala više od 20 godina

U ime cijelog kolektiva, on se zahvalio Imamović na dugogodišnjoj saradnji, istakavši da je ona u svakom trenutku bila na dobrobit institucije i javne službe koju je dosljedno, posvećeno i profesionalno obavljala. On je naglasio da su pouzdanost, savjesnost, marljivost i profesionalizam, osobine koje je svojim odnosom prema poslu i kolektivu Imamović trajno vezala za svoje ime, kao najviše standarde poslovnosti i kolegijalnosti.

U emotivnom govoru, Imamović se zahvalila glavnom tužiocu, tužiocima i drugim kolegama i koleginicama na saradnji i podršci tokom prethodne 22 godine, koliko je obavljala poslove šefice administracije. Naglasivši da će je za Tužilaštvo najprije vezivati iskrena kolegijalnost koju neće zaboraviti, Imamović je istakla da će joj uz najljepše uspomene ostati velika čast što je javnu službu obavljala upravo u ovoj pravosudnoj instituciji od njenog osnivanja.

BILTEN ZA  **VIDLJIVOST PRAVDE**

Izdavač: Tužilaštvo Brčko distrikta Bosne i Hercegovine

Odgovorna osoba: Zekerija Mujkanović, glavni tužilac Tužilaštva Brčko distrikta BiH

Priprema publikacije: Samir Beganović, sekretar Tužilaštva Brčko distrikta BiH





Tužilaštvo Brčko distrikta Bosne i Hercegovine



Kontaktirajte nas



Trg pravde, broj 10, 76 100 Brčko,

Brčko distrikt Bosne i Hercegovine

centrala 049/217-227

glavni tužilac 049/217-465

faks 049/ 219-088

jtbd@jtbd.ba (**elektronski protokol**)

z.mujkanovic@jtbd.ba i zekerija.mujkanovic@pravosudje.ba (**glavni tužilac**)

v.tepavcevic@jtbd.ba (**zamjenik glavnog tužioca**)

prijavakorupcije@jtbd.ba (**protokol za prijavu korupcije**)

prijavadiskriminacije@jtbd.ba (**protokol za prijavu rodne diskriminacije**)

pritužbe@jtbd.ba (**protokol za pritužbe na rad službenika**)

s.beganovic@jtbd.ba (**protokol za odnose s javnošću**)

Direktne email adrese zaposlenih: početnoslovoimena.prezime@jtbd.ba

INTERNETSKE PLATFORME

<http://jt-brckodistriktbih.pravosudje.ba>

[Facebook](#)



PRIZNANJE ZA POSEBAN DOPRINOS
TRANSPARENTNOSTI PRAVOSUĐA

NAJVIŠI INDEKS TRANSPARENTNOSTI TUŽILAŠTAVA

PR - MONITORING

IZVANREDNO

2022.